

Inatsisartut Suleriaasianni § 36 innersuussutigalugu apeqquteqaat allaavigalugu Inatsisartuni oqallisissiamik siunnersuut imaattoq saqqummiupparput:

Nunatsinni umiarsuarni aqumiutut ilinniarsimasut suliffissaqarnikkut periarfissaat qanoq pitsaanerulersinneqarsinnaanersut qulaajarumallugu apeqquteqaat aallaavigalugu oqallinnissamik siunnersuut.

(Inatsisartunut ilaasortat Saxtorph Didriksen aamma Lars Mathæussen, Siumut)

Tunngavilersuut

Nunatsinni ukiorpassuarni Naalaganngormiat Ilinniarfianik ingerlatsivugut aammalu tunngaviusumik imarsiornermik ilinniarfimmik peqarluta, taakkualu saniatigut piniartutut aalisartutullu ilinniarfeqarluta. Taakkunani ilinniarfinni naammassisartunut inatsisitsigut periarfissiissutsigisavut Kalaallit Nunatsinni tamakkiisumik atunngilagut. Periarfissat qanoq atorluarneqarsinnaanerat ujartorumallugu aqumiutullu ilinniarsimasut atorluarneqarnerunissaat siunertaralugu matumuuna apeqquteqaat aallaavigalugu oqallinnissamik siunnersuummik saqqummiussivunga.

Kalaallit aalisariutaanni inuttalersuisarnek pillugu Namminersorlutik Oqartussat nalunaarutaat nr. 13, 17. november 2011-imeersoq-mi ilaatigut allassimavoq inuttaasut officeriusut (aqumiut) minnerpaamik 60 %-ii Kalaallit Nunaanni najugaqartutut inuit nalunaarsorsimaffianni nalunaarsorsimassasut. Nalunaarutip taassuma malinneqarnissaata isumaginissaa pikkoriffigivallaarsimangilarput, tassami assersuutigalugu ilisimaneqarpoq Royal Greenland-ip kilisaataataanni inuttaqarnermut tunngatillugu nalunaarut malinneqartuaannangitsoq, tamannalu nunatsinnut iluaqutaanngilaq. Taamatuttaaq aamma nunatta pigisaa Royal Arctic Line eqqarsaatigalugu sulisut nunatsinni najugaqartuunissaannik pimoorusaanerusumik piumasaqarnissaq nunatsinnut iluaqutinngortissinnaavarput.

Malittarisassaq Kalaallit Nunaata innuttaanut illersuisoq pisariaqarpoq nunatta naalagaaffinngornissaanut aammalu kingulissagut ilinniarsimassutsimik qaffassisumik pigisaqalersimanissaat eqqarsaatigalugu, taamaalilluta nunatsinni innutaasunut imarsiorniartunut suliffissaqarnikkut politikikkut illersukkamik innuttaasullu suliffeqarnikkut inuttut inuuniarnikkut peqqinnartumik inuunissaannut aqutissarsiutissagatsigit.

Imarsiornermik ilinniartitaanerit pillugit Inatsisartut peqqussutaat nr. 7, 11. november 2000-imeersumi nunatsinni imarsiornermik ilinniartitaaneq illersugaavoq, taamaakkaluortoq ullumikkut kalaallit aqumiutut ilinniarsimasut suliffeqartut amerlanngillat, tassami aalisariutini, sinersortaatini assartuutinilu aqumiut amerlanerpaartaat nunanit allaninngaanneersuupput.

Nunatsinni umiarsuarni aqumiutut ilinniarsimasut suliffissaqarnikkut periarfissaat pitsaanerulersikkumallugit malittarisassiornermi piumasaqaataasinnaavoq nunatsinni aalisariutit, sinersortaatit assartuutilluunniit aqumiunik inuttassarsioraangamik kikkut tamat takusinnaasaannik inuttassarsiortassasut, taamaalillutik Kalaallit Nunaanni najugaqartunik aqumiortaarsinnaanerat pitsaasumik aqutissiuunneqassammat.

Apeqquteqaat aallaavigalugu oqallinnissamik siunnersuusiorninni umiarsuarni aqumiut nunani allaneersut inulariniarsarinngilakka, kisianniuna nunatsinni aqumiutut ilinniarsimasut ullumikkut suliffeqanngittut illersorniarlugit una siunnersuut saqqummiukkiga, tassami nunatsinni najugaqartut suliffissaqartittariaqarpagut piginnaanngorsartuarlugillu tamattami siunissarput pineqarmat.

Oqallilluarnissarput inussiarnersumik kissaatigaara.